

Zeitschrift: Annalas da la Societad Retorumantscha
Herausgeber: Societad Retorumantscha
Band: 80 (1967)

Artikel: Poesia surmirana
Autor: Cadotsch, Peder
DOI: <https://doi.org/10.5169/seals-227962>

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 02.12.2025

ETH-Bibliothek Zürich, E-Periodica, <https://www.e-periodica.ch>

Poesia surmirana

da

Peder Cadotsch

Fastezs

Chior sen igl plang
sa crouschan
fastezs
e svaneschan! —

En soffel sfardaint
ambratscha
la neiv —
e schalainta.

En radi lontan
stulescha! —
La notg
ossa reiva.

E sen en tgagliom
s'andorma
en corv —
e pirescha! — — —

Crappa segl trotg

Igl trotg tras l'ognera
è surtratg
cun crappa
radonda e gida.

En pè elegant e niv
passa svelt e sieir
sur la crappa
digl trotg solitar. —

En tatg da sanc angal
séia chi e lò
ved la crappa radonda
e gida digl trotg.

Igl trotg tras l'ognera
s'andorma —
e las zerps liegian
cun îgls mievels
e glischaints! —

Notg

Las plantas teissan
sumbreivas
segl stgeir
tarratsch digl gôt.

En sgolanotg am streffla
igls tgavels , —
scu cun'na greffla
d'en diavel
stgeir
e neir
ainten la notg.

Ed an mies îgls
ena larma gleischa
lev-levign
cugl amprem radi
dalla gligna
tgi tgitta mievla
tras la notg! —

Purificaziun

La greva daratga
s'è ossa ratratga!

Igl gôt raspeira
gl'aroma da rascha
e dascha.
Las guglias digls pigns
sanglottan las davosas larmas
giu aint igl mestgel
cregn-bletsch digl gôt.

La tera femma
scu'n altar d'unfrenda
e saleida
la gleisch
d'en nov suglegl
plagn anim
e plagn speranza.

Er mia orma spulvrantada
saro pi leva
e pi cuntainta,
saro purifitgieda
da l'ava frestga
digl grev stampro. —

Sbrenzlas

Las sbrenzlas von
davent
cugl vent
schigliunsch tgi pon.

Las sbrenzlas meidan
sessour
calour
e prest sa steidan.

Gl'è scu en'orma
tgi nescha
e crescha
e bôt s'andorma.

La semenza

Igl pour ò'gl grang
samno!
Tgiso
sch'el saro sang?

Igl pour cristiang
ò fatg
bufatg
la crousch cugl mang.

Digl tschiel igl mang
varro
chito
pigl fretg digl pang.

Fastezs tras igl gôt

I'pass tras gôt e neiv,
tras stgeir
e neir — e freid! —
Sulet! —

Igl mies fastez angal
am suonda
da cuntign
tras igl freid dalla neiv.

Ma igl fastez schalo
franc rastaro
anc dei — e dei
sen la curveia schalantada
dalla neiv!

Te posst el tgunsch cattar,
igl mies fastez,
sch'te vot am suondar
tras igl stgeir
e freid
digl gôt d'anviern! —
Sulet! —

Notg burasclousa

En tung sfarregia
tras la notg!
Igl gôt trembla
e suspeira.
Ena glioir tamantada
gizza l'ureglia
e terla —
e spetga!

Ma tras igl tgagliom
sluitta la golp
tgi tschertga preda
ainten igl stgeir
e spess
digl gôt nocturn.

Igl tung sfarregia
tras la notg — —
e las neivlas bragian —,
bragian stagn
ed an cuntign
sen la selva
tgi trembla
e schema e bragia! — —

Til da bara

Curals neirs
d'en lung paternos
zerpegian mét
tras la lòzza
digl vial.

Rodas grevas scrouschan
sen la gera.
Dus tgavals boffan
davant la tgargia
neira — e méttà! —

Tras igl suspeir
digls sains
teissa la plievgia
ena spessa brainta
da tgodas larmas! —